

KONSEP DAN DEFINISI

PENGENALAN

Penyusunan data akaun negara yang ditunjukkan dalam jadual penerbitan ini adalah item terpilih daripada keseluruhan sistem perakaunan negara yang merekodkan semua aktiviti ekonomi. Sistem perakaunan negara meliputi pengeluaran, perbelanjaan, penjana dan pengagihan pendapatan, pembiayaan, tabungan dan pelaburan bagi keseluruhan ekonomi.

Sistem perakaunan ini ditakrifkan oleh Pertubuhan Bangsa-Bangsa Bersatu dan transaksi yang diberikan adalah mengikut panduan *Systems of National Accounts 2008 (SNA 2008)*.

KELUARAN DALAM NEGERI KASAR (KDNK)

Keluaran Dalam Negeri Kasar (KDNK) adalah jumlah nilai barangan dan perkhidmatan yang dikeluarkan dalam tempoh tertentu selepas ditolak kos barang dan perkhidmatan yang digunakan dalam proses pengeluaran. Nilai ini merupakan nilai sebelum ditolak nilai peruntukan bagi modal tetap; iaitu jumlah nilai ditambah pada harga pengeluar bagi pengeluar residen ditambah dengan duti import. KDNK ini juga bersamaan dengan perbelanjaan ke atas KDNK (pada harga pembeli) iaitu jumlah bagi semua komponen perbelanjaan akhir ke atas barangan dan perkhidmatan tolak dengan import barangan dan perkhidmatan.


KDNK boleh diukur dengan menggunakan tiga kaedah iaitu Kaedah Pengeluaran, Perbelanjaan dan Pendapatan. Namun begitu, penerbitan ini hanya menggunakan Kaedah Pengeluaran dan Perbelanjaan sahaja.

KAEDAH PENGELUARAN

KDNK berasaskan Kaedah Pengeluaran boleh didefinisikan sebagai jumlah nilai barangan dan perkhidmatan yang dikeluarkan di Malaysia setelah ditolak dengan nilai penggunaan perantara. Kaedah ini turut dikenali sebagai kaedah nilai ditambah yang mana ia menunjukkan sumbangan setiap aktiviti ekonomi terhadap keseluruhan KDNK.

KDNK merupakan sistem perakaunan catatan bergu dan dalam penerbitan ini, ianya ditunjukkan seperti berikut:

- (a) Jumlah nilai ditambah kasar bagi semua pengeluar yang terlibat dalam ekonomi; atau
- (b) Perbezaan antara output kasar bagi semua pengeluar tolak penggunaan perantara (sebagai input).



OUTPUT

Output adalah nilai barangan dan perkhidmatan yang dikeluarkan. Ini termasuk pengeluaran untuk pasaran, pengeluaran untuk kegunaan sendiri dan pengeluaran bukan pasaran (perkhidmatan kerajaan dan NPISHs). Pengeluaran barangan dan perkhidmatan tidak semestinya untuk dijual atau perolehan oleh pertubuhan.

NOTA TEKNIKAL

PENGUNAAN PERANTARAAN

Penggunaan perantara adalah nilai barangan dan perkhidmatan yang digunakan (sebagai input) dalam proses pengeluaran barangan dan perkhidmatan tidak termasuk gaji dan upah, susut nilai daripada modal dan faedah bersih yang dibayar.

NILAI DITAMBAH

Nilai ditambah adalah perbezaan di antara output dan penggunaan perantara. Ia merupakan nilai ditambah barangan dan perkhidmatan dalam aktiviti ekonomi. Oleh itu, ia hampir menyamai dengan keuntungan perniagaan, gaji dan upah, susut nilai dan cukai tidak langsung; campur faedah yang dibayar dan tolak faedah yang diterima.

CUKAI

Di dalam perakaunan negara, cukai dinyatakan dalam dua bentuk iaitu:

(a) CUKAI TIDAK LANGSUNG

Cukai tidak langsung dianggap sebagai kos pengeluaran, di mana ia adalah sebahagian daripada komponen nilai ditambah. Oleh itu, cukai tidak langsung perlu ditambah pada nilai barangan dan perkhidmatan. Cukai tidak langsung termasuk cukai jalan, cukai nilai ditambah, duti eksais, cukai pintu dan lain-lain.

(b) CUKAI LANGSUNG

Cukai langsung adalah cukai ke atas keuntungan dan pendapatan, di mana ia merupakan pengagihan semula pendapatan dari sektor swasta kepada sektor awam dan bukan dalam bentuk kos pengeluaran. Dalam konteks Malaysia, cukai pendapatan merupakan cukai langsung yang paling utama.

KAEDAH PERBELANJAAN

KDNK berasaskan Kaedah Perbelanjaan adalah penjumlahan Penggunaan Akhir Swasta, Penggunaan Akhir Kerajaan, Pembentukan Modal Tetap Kasar, Perubahan Inventori dan Barangan Berharga, Eksport barangan dan perkhidmatan dan ditolak dengan Import barangan dan perkhidmatan. Semua komponen ini dikategorikan sebagai 'permintaan akhir' atau 'perbelanjaan akhir'. Kaedah ini mengira nilai barangan dan perkhidmatan yang digunakan oleh pengguna akhir terhadap barangan dan perkhidmatan yang dikeluarkan oleh residen.

$$\text{KDNK} = C + G + I + X - M$$

C Perbelanjaan Penggunaan Akhir Swasta (Isi rumah dan Institusi Bukan Keuntungan yang Berkhidmat kepada Isi rumah)

G Perbelanjaan Penggunaan Akhir Kerajaan

I Pembentukan Modal Tetap Kasar + Perubahan Inventori dan Barangan Berharga

X - M Eksport Barangan dan Perkhidmatan - Import Barangan dan Perkhidmatan

PENGIMBANGAN ANTARA ANGGARAN PENGELUARAN DAN PERBELANJAAN

Secara teori, anggaran KDNK bagi kedua-dua kaedah harus menghasilkan nilai yang sama. Walau bagaimanapun, secara praktikal, anggaran nilai bagi kedua-dua kaedah ini tidak akan sama kerana penggunaan sumber data yang berlainan. Perbezaan ini dikenali sebagai "Perbezaan Statistik" dalam *System of National Accounts*.



PENILAIAN TRANSAKSI

Anggaran dinyatakan dalam dua jenis harga iaitu harga semasa dan harga malar (tahun asas 2015). Pelbagai teknik digunakan dalam membuat nilai anggaran pada harga semasa dan malar.

KDNK PADA HARGA MALAR

KDNK pada harga malar adalah nilai KDNK tanpa kesan harga. KDNK pada harga malar ini penting bagi membolehkan perbandingan sebenar perubahan tingkat pengeluaran/ kuantiti barangan dan perkhidmatan yang berlaku dalam aktiviti ekonomi.

PENDEFLASI HARGA TERSIRAT

Bagi mendapatkan siri harga malar, kaedah deflasi langsung yang terdiri daripada deflasi tunggal dan deflasi berganda digunakan. Kaedah deflasi tunggal menghapuskan pengaruh harga daripada output atau input yang telah dianggarkan manakala deflasi berganda pula menghapuskan pengaruh harga daripada output dan input. Oleh itu, nilai ditambah diperolehi sebagai perbezaan hasil tolak input daripada output.

Indeks harga utama yang digunakan adalah Indeks Harga Pengeluar, Indeks Harga Pengguna dan Indeks Harga Pengeluar Perkhidmatan. Sementara itu, bagi barangan dan perkhidmatan yang tidak terdapat dalam kedua-dua indeks ini, maklumat harga diperolehi dari pertubuhan yang terlibat. Maklumat ini kemudiannya dijadikan indeks harga terbitan khususnya bagi barangan dan perkhidmatan tersebut.

HUBUNGAN ANTARA ANGGARAN KDNK DAN IMBANGAN PEMBAYARAN

Siri akaun negara yang dikeluarkan dalam penerbitan ini adalah konsisten dengan anggaran tahun imbalan pembayaran yang dikeluarkan oleh Jabatan Perangkaan Malaysia. Kedua-dua anggaran ini menunjukkan penyata yang lengkap mengenai transaksi antara Malaysia dengan negara-negara lain pada harga semasa.

KLASIFIKASI

Penyusunan KDNK selaras dengan klasifikasi seperti berikut;

- Piawaian Klasifikasi Industri Malaysia (MSIC 2008)
- *Malaysia Classification of Product by Activity (MCPA 2009)*
- *Classification of the Functions of Government (COFOG)*
- *Classification of Individual Consumption by Purposes (COICOP)*
- *Standard International Trade Classification (SITC) Rev. 4*

NOTA TEKNIKAL

METODOLOGI, SUMBER DATA DAN GLOSARI

Maklumat tersebut boleh diperoleh dari portal Jabatan (www.dosm.gov.my).

PENERBITAN DAN SEMAKAN DATA

Penerbitan ini memberikan semakan anggaran KDNK tahunan bagi tahun 2020 hingga 2022. Semakan adalah berdasarkan data terkini banci/ survei tahunan/ dwi-tahunan dan akaun syarikat/ perusahaan individu bagi tahun 2020 dan 2021. Bagi tahun terkini 2022, anggaran adalah berdasarkan kepada sumber data suku tahunan.

Siri masa tahunan ini akan dikemaskini setiap tahun.